



Nataon'i Cheryl A. Esplin

Mpanolotsaina Faharoa ao amin'ny
Fiadidian'ny Kilonga Maneran-tany

Ny Fanasan'ny Tompo—Fanavaozana ho an'ny Fanahy

Manasitrana sy manavao ny fanahintsika ny Fanahy Masina. Ny fitahiana ampanantenain'ny fanasan'ny Tompo dia ny "hananantsika mandrakariva ny Fanahiny miaraka [amintsika]."

Indray mandeha nisy andian-jatovovavy nanontany ahy hoe: "Inona no irinao hoe mba tokony ho efa fantatrao fony ianao nitovy taona taminay?" Raha izaho no mamaly izany fanontaniana izany dia ampidiriko ao ity eritreritra ity hoe: "Iriko raha mba nahatakatra bebe kokoa ny maha-zava-dehibe ny fanasan'ny Tompo aho fony aho nitovy taona tamareo. Iriko raha mba takatro tamin'ilay fomba namaritan'ny Loholona Jeffrey R. Holland izany ny fanasan'ny Tompo. Hoy izy hoe: 'Anisan'ireo fanasana tsy afamisaraka amin'ny fanasan'ny Tompo ny mba hahatonga izany ho zavatra iainana tena ara-panahy sy ho fifandraisana masina ary ho fanavaozana ho an'ny fanahy.¹"

Ahoana no ahatongavan'ny fanasan'ny Tompo ho "zavatra iainana tena ara-panahy sy ho fifandraisana masina ary ho fanavaozana ho an'ny fanahy" isan-kerinandro?

Lasa zavatra iainana mampatanjaka ny ara-panahy ny fanasan'ny Tompo

rehefa mihaino ny vavaka amin'ny fanasan'ny Tompo isika ka manolo-tena indray amin'ny fanajana ireo fanekepihavanantsika. Mba hanaovana izany dia tsy maintsy vonona hitondra ny anaran'i Jesoa Kristy eo amintsika isika.² Raha niresaka momba izany fampanantenana izany ny Filoha Henry B. Eyring dia nampianatra izy hoe: "Midika izany fa tokony hihevitra isika hoe Azy ny tenantsika. Ho ataontsika lohalaharana eo amin'ny fainantsika Izy. Haniry kokoa ny zavatra iriny isika toy izay hitady izay irintsika na izay ampianarin'izao tontolo misy antsika izao mba hiantefan'ny fanirantsika."³

Rehefa mandray ny fasan'ny Tompo isika dia manao



fanekempihavanana ihany koa mba "hahatsiaro mandrakariva"⁴ an'i Jesoa Kristy. Tamin'ilay alina nialoha ny nanomboana Azy dia namory ny Apôstôliny nanodidina Azy i Kristy ka nanao ny fanasan'ny Tompo. Namaky mofo Izy dia nanamasina izany ka nilaza hoe: "Raiso, hano; izao dia ho fahatsiarovana ny vatako izay homeko ho onitra ho anareo."⁵ Avy eo dia nan-dray ny kalisin-divay Izy dia nisaotra sy nanome izany an'ireo Apôstôliny mba hisotroany ary niteny hoe "Izao dia ho fahatsiarovana ny rako. . . , izay alatsaka ho an'izay rehetra hino ny anarako."⁶

Naiveriny teo anivon'ny Nefita ary avy eo indray dia tamin'ny Famerenena tamin'ny Laoniny ny Fianganany tamin'ny andro farany fa tokony handray ny fanasan'ny Tompo isika ho fahatsiarovana Azy.⁷

Rehefa mandray ny fanasan'ny Tompo isika dia mijoro ho vavolombelona amin'Andriamanitra fa hahatsiaro mandrakariva ny Zanany, fa tsy mandritra ilay fotoana fohy hanaovana ny ôrdônansin'ny fanasan'ny Tompo ihany. Midika izany fa hiantehitra mandrakariva amin'ny ohatra sy ny fampianaran'ny Mpamony isika mba hitarika ny eritreritsika sy ny safidintsika ary ny asantsika.⁸

Mampahatsiahy antsika ihany koa ny vavaka amin'ny fanasan'ny Tompo fa tsy maintsy "mitandrina ny didiny"⁹ isika.

Hoy i Jesoa hoe: "Raha tia ahy hianareo, dia hitandrina ny didiko."¹⁰ Ny fanasan'ny Tompo dia manome antsika fahafahana handinihan-tena sy fahafahana hampitodika ny fontsika sy ny sitrapontsika amin'Andriamanitra. Mitondra ny herin'ny filazantsara eo amin'ny fainantsika ny fankatoavana ireo didy sady mitondra fiadanana bebe kokoa sy mampitombo ny ara-panahy.

Ny fanasan'ny Tompo dia manome fotoana hiaianana traikera tena ara-panahy rehefa misaintsaina mikasika ny hery manavotra sy manafaky ny Mpamony tamin'ny alalan'ny Sorompanavotany isika. Vao haingana izay ny mpitarika iray ao amin'ny Zatovavavy no nianatra momba ny tanjaka azontsika rehefa miezaka mandray

amim-pisaintsainana tsara ny fana-san'ny Tompo isika. Raha niezaka namita zavatra iray izay takina ao amin'ny Mon Progrès Personnel izy dia nametraka tanjona mba hifantoka amin'ny tononkira sy ny teny ao anatin'ny vavaka amin'ny fana-san'ny Tompo.

Nanao fanombantombanana ny tenany izy isan-kerinandro nandritra ny fanasan'ny Tompo. Tadidiny ireo fahadioana nataony, ary nanolo-tena izy ny ho lasa tsaratsara kokoa ny herinandro manaraka. Feno fankasitrhana izy tamin'ny fahafahany nanitsy ny lalany ka nanjary voadio. Rehefa nanao jery todika momba ilay zavatra niainany izy dia niteny hoe: "Nanao ilay fibebahana izay ampahany amin'ny Sorompanavotana aho."

Indray Alahady taorian'ny nanaovany fanombantombanana ny tenany manokana dia nanomboka nahatsapa ho kivy sy tsisy fanantenana izy. Hitany fa namerina ny fahadioana efa nataony hatrany hatrany izy, isan-kerinandro izao. Saingy tamin'izay dia nanana fahatsapana niavaka izy fa nanao tsinontsinona ny ampahany lehibe iray ao amin'ny Sorompanavotana—ilay hery manafaka izay an'i Kristy. Adinony ireo fotoana rehetra nanampian'ny Mpamonjy azy ho tonga ilay olona tiany hahatongavana sy hanompo mihoatra noho ny fahafahamanao nananany.

Teo am-pisaintsainana izany dia nieri-treritra ny herinandro lasa indray izy. Hoy izy hoe: "Nisy fahatsapana fifaliana nipoitra avy tao anatin'ilay fahatsapako alahelo rehefa tsikaritro fa nanome fahafahana sy fahaizana maro ho ahy Izy. Tsikaritro tamim-pankatelemana ny fahaizana nananako hahafantatra mora foana ny zavatra nilain'ny zanako izay tsy hita nibaribary tamin'izany fotoana izany. Tsikaritro fa tamin'ny andro nahatsapako hoe tsy afaka nanatontosa aho na dia zavatra iray aza dia afaka nanolotra teny fankaherezana tamin'ny namana iray aho. Nampiseho fahare-tana aho tamin'ny zava-nitrange izay mazàna niteraka tsy fananana fahare-tana tato anatiko."

Dia nofaranany hoe: "Rehefa nisaotra an'Andriamanitra aho tamin'ny

hery izay an'ny Mpamonjy izay misy eo amin'ny fainako dia nahatsapa ho nanana fanantenana kokoa aho tamin'ny dingan'ny fibebahana izay notontosaiko ary niandrandra ny herinandro manaraka tamin'ny fanantenana nohavaozina aho."

Nampianatra ny fomba ahafahan'ny fanasan'ny Tompo ho tonga traikera manasitrana sy manadio ny Loholona Melvin J. Ballard. Hoy izy hoe:

"Iza amintsika no tsy mandratra ny fanahiny amin'ny alalan'ny teny, eritreritra na asa mandritra ireo andro eo anelanelan'ny Sabata roa? Manao zavatra izay anenenantsika isika dia maniry ny ho voavela heloka. . . . Ny fomba ahazoana famelan-keloka dia . . . ny mibebaka amin'ny fahotantsika, mandeha any amin'ireo izay nanaovantsika ny tsy mety na tohina noho ny amintsika ka mangataka ny famelan'izy ireo ary miverina eo amin'ny latabatry ny fanasan'ny Tompo izay hamelana ny helotsika, raha tena nibebaka tamin-kitsimpo tokoa isika ary nanatsara ny toe-javatra iainan'ny tenantsika, dia ho tonga amin'ny fanahintsika ny fanasitrana ara-panahy. . . .

"Vavolobelona iray aho," hoy ny Loholona Ballard "fa misy fanahy iray manatrika ny fanatanterahana ny fanasan'ny Tompo izay manafana ny vatana iray manontolo hatrany antampon-doha ka hatrany am-paladia; tsapanao fa sitrana ireo ratran'ny fanahy, ary nohamaivanina ny entamvesatra. Tonga amin'ny fanahy izay mendrika sy tena maniry ny handray ity sakafo ara-panahy ity ny fiononana sy fahsambarana."¹¹

Azo sitrana sy havaozina ny fanahintsika izay maratra satria tsy mampahatsihy antsika ny fanoloran'ny Mpamonjy ny vatany sy ny rany ho sorona fotsiny ihany ny mofo sy ny rano fa mampahatsihy antsika koa ireo tandindona ireo fa ho "monfonaina"¹² sy ho "rano velona"¹³ ho antsika mandrakariva Izy.

Taorian'ny nanatanterahany ny fanasan'ny Tompo teo amin'ny Nefita dia hoy i Jesoa hoe:

"Izay mihinana ity mofo ity dia mihinana amin'ny vatako ho an'ny

fanahiny; ary izay misotro amin'ity divay ity dia misotro amin'ny rako ho an'ny fanahiny; ary tsy ho noana na hangetaheta na oviana na oviana ny fanahiny, fa hovokisana kosa.

"Ankehiririny, rehefa avy nihinana sy nisotro avokoa ny valalabemandry, dia indro, heniky ny Fanahy izy ireo."¹⁴

Mampianatra antsika i Kristy amin'i-reo teny ireo fa ny Fanahy dia manasitrana sy manavao ny fanahintsika. Ny fitahiana ampanantenain'ny fana-san'ny Tompo dia ny "hananan[tsika] mandrakariva ny Fanahiny miaraka amin[tsika]."¹⁵

Rehefa mandray ny fanasan'ny Tompo aho dia alaiko sary an-tsaina indraindray ny sary hosodoko iray izay mampiseho ny Mpamonjy nitsangana tamin'ny maty miaraka amin'ny sandrin mitsotra, toy ny hoe vonona handray antsika ka hamihina antsika am-pitiavana. Tiako io sary hosodoko io. Rehefa mieritreritra izany aho mandritra ny fanatanterahana ny fanasan'ny Tompo dia mahazo hery ny fanahiko ka toy ny afaka maheno ny tenin'ny Mpamonjy aho hoe: "Indro, ny sandrin'ny famindram-poko dia mitsotra aminareo, ary na zovy na zovy no ho avy dia izy no horaisiko; ary hotahiana ireo izay mankaty Amiko."¹⁶

Misolo tena ny Mpamonjy ireo mpihazona ny Fisoronana Aharôna rehefa manomana sy mitsodrano ary mizara ny fanasan'ny Tompo. Rehefa maninjitra ny sandrin hanolotra antsika ireo tandindona masina ny mpihazona ny fisoronana iray dia toy ny hoe ny Mpamonjy Izy tenany mihtisy no maninjitra ny sandrin'ny famindram-pony, ka manasa ny tsirairay amintsika handray amin'ireo fanomezana sarobidin'ny fitiavana izay nomena tamin'ny alalan'ny sorompanavotany—ireo fanomezan'ny fibebahana, ny famelan-keloka, sy ny fampiononana ary ny fanantenana.¹⁷

Arakaraky ny hisaintsainantsika ny maha-zava-dehibe ny fanasan'ny Tompo no maha-manan-danja izany amintsika. Izao no nambaran'ny raimpianakaviana 96 taona iray rehefa nanontany ny zanany lahy hoe: "Dada a! Fa inona no antony andehananao any

am-piagonana? Tsy afaka mahita ianao, tsy afaka mandre, sarotra aminao ny mandehandeha. Inona no antony andehananao any am-piagonana?" Namaly ilay raim-pianakaviana nanao hoe: "Ny fanasan'ny Tompo. Mandeha any aho mba handray ny fanasan'ny Tompo."

Enga anie ny tsirairay amintsika mba ho tonga amin'ny favoriana fanasan'ny Tompo ary vonona ny hahatsapa "zavatra iainana tena ara-panahy sy fifandraisana masina ary fihazaovan'ny fanahi[ntsika]."¹⁸

Fantattro fa velona ny Raintsika any an-danitra sy ny Mpamonjintsika. Feno fankasitrahana aho amin'ny fahafahana omen'ny fanasan'ny Tompo mba hahatsapana ny fitiavann'Izy ireo sy handraisana ny Fanahy. Amin'ny anaran'i Jesoa Kristy, amena. ■

FANAMARIHANA

1. Jeffrey R. Holland, *Christ and the New Covenant: The Messianic Message of the Book of Mormon* (1997), 283.
2. Jereo ny Fotopampianarana sy Fanekempihavanana 20:77.
3. Henry B. Eyring, "That We May Be One," *Ensign*, Mey 1998, 67.
4. Fotopampianarana sy Fanekempihavanana 20:77, 79.
5. Dikantenin'i Joseph Smith, Matio 26:22 (ao amin'ny Torolalana ho an'ny Soratra Masina).
6. Dikantenin'i Joseph Smith, Matio 26:24 (ao amin'ny Torolalana ho an'ny Soratra Masina); jereo ihany koa ny Matio 26:26–28; Marka 14:22–24; Lioka 22:15–20.
7. Jereo ny 3 Nefia 18:7, 11; Fotopampianarana sy Fanekempihavanana 20:75.
8. Jereo ny "Comment est-ce que Je Respecte Mon Alliance de Toujours Me Souvenir du Sauveur?" *Viens et Suis-Moi* Fandaharam-pampianaran'ny Sekoly Alahady; lds.org/youth/learn/ss/ordinances-covenants/remember; *Miorim-paka amin'ny Finoana: Boky Fanovozan-kevitra amin'ny Filazantsara* (2004), 147–48.
9. Fotopampianarana sy Fanekempihavanana 20:77.
10. Jaona 14:15.
11. Melvin J. Ballard, in Melvin R. Ballard, *Melvin J. Ballard: Crusader for Righteousness* (1966), 132–33.
12. Jaona 6:48.
13. Jaona 4:10.
14. 3 Nefia 20:8–9.
15. Fotopampianarana sy Fanekempihavanana 20:77.
16. 3 Nefia 9:14.
17. Feno fankasitrahana an'i Ann Madsen aho noho ny hevi-baovao narosony mikasika ity fitsipika ity.
18. Jeffrey R. Holland, *Christ and the New Covenant*, 283.



Nataon'ny Loholona Chi Hong (Sam) Wong
Ao amin'ny Fitopololahy

Manavotra ao anatin'ny Firaissankina

Mba hanampiana ny Mpamonjy dia mila miara-miasa ao anatin'ny firaissankina sy filaminana isika. Manan-danja ny olona rehetra sy ny toerana iandraiketana rehetra ary ny antso rehetra.

Matetika isika no maheno ny Filoha Thomas S. Monson miteny hoe: "Mandehana manavotra"¹ Tonga ato an-tsaiko ny tantara iray ao amin'ny Testamenta Vaovao. Ohatra tsara indrindra amin'ny fomba ahafahan'ny mpikambana sy ny misiônera miara-miasa ao anatin'ny firaissankina izany amin'ny alalan'ireo filankevity ny paroasy mba handeha ka hanavotra. Hita ao amin'ny Marka 2:1–5 ilay tantara. Hitako fa tena mitaona fanahy sy mora takarina foana ireo zavatra nianana nampiasain'i Jesoa mba hampianarana antsika fotopampianarana sy fitsipika sasantsasany.

Anisan'ireo olona ao amin'ity tantara ity ny lehilahy iray mararin'ny paralysisa, olona tsy afaka nihetsika raha tsy nisy mpanampy. Tsy nahavita afa-tsy ny mijanona ao an-trano izy, miandry olona hanavotra.

Amin'izao androntsika izao dia mety ho toy izao no fitrangan'izany. Olona efatra no nanatanteraka asa nampandraiketin'ny evekany azy mba hamangy lehilahy iray izay voan'ny

paralysisa any an-tranony. Azoko sary an-tsaina ny iray amin'izy ireo avy ao amin'ny Fikambanana Ifanampiana, ny iray avy ao amin'ny kôlejin'ny loholona, ny iray avy ao amin'ny Fisoronana Aharôna, ary ny iray farany fa tsy ny kely indrindra, misiônera amin'ny fotoana feno. Nandritra ny filankevity ny paroasy farany indrindra, rehefa avy nifanakalo hevitra momba ny zavatra ilaina tao amin'ny paroasy izy ireo dia nampiandraikitra asa "fanavotana" ny eveka. Nasaina hanampy ity lehilahy mararin'ny paralysisa ity ireto olona efatra ireto. Tsy

